



Fyrsta fréttabréf AVD

Hér gefur að líta fyrsta tölublað fréttabréfs almannavarnadeildar ríkislögreglustjórans (AVD). Fréttabréfi þessu mun verða dreift rafrænt til allra samstarfsaðila AVD með það að markmiði að kynna helstu verkefni sem deildin er að vinna hverju sinni. Í því verður einnig komið á framfæri upplýsingum sem við teljum að eigi erindi til þeirra sem vinna að þeim málaflokkum sem AVD hefur með að gera.

Fréttabréfið verður gefið út eftir því sem efni standa til en þó ekki sjaldnar en ársfjórðungslega og verður hægt að nálgast það á vefsíðu almannavarnadeildarinnar

www.almannavarnir.is

Með von um jákvæðar viðtökur,

Víðir Reynisson



Starfsmenn AVD: Rögnvaldur, Íris, Guðrún, Víðir og Ágúst Gunnar

Vinna við gerð viðbragðs- og flugslysaáætlana

Almannavarnadeildin er í samstarfi við almannavarnanefndir víða um land um gerð viðbragðsáætlana. Verið er að gera viðbragðsáætlun vegna hugsanlegs stíflurofs við Kárahnjúkavirkjun í samvinnu við almannavarnanefndir Fljótsdalshéraðs og Borgarfjarðar eystri. Haft hefur verið samráð og samstarf við margar stofnanir og félagasamtök við gerð áætlunarinnar. Fundað var í janúar s.l. að Brúarási í Jökulsárhlíð með íbúum svæðisins, almannavarnanefndunum, Landvirkjun, sýslumanninum á Seyðisfirði og fleirum um stöðu viðbragðs- og rýmingaráætlunar vegna hugsanlegs stíflurofs í Háslóni. Þá er verið að vinna að viðbragðs- og rýmingaráætlun vegna eldgoss í Eyjafjallajökli í samvinnu við almannavarnanefnd Rangárvallasýslu. Verið er að leggja lokahönd á nokkrar flugslysaáætlunir sem eru hluti séráætlana almannavarna. Stefnt er að því að flestir stærri flugvellir á landinu verði komnir með áætlunir á næstu árum. Flugslysaáætlunir eru gerðar af heimamönnum, með aðstoð Flugstoða og almannavarnadeildarinnar. Í vor eru fyrirhugaðar æfingar á nokkrum áætlunum m.a. á Sauðárkróki.

Vettvangs- og aðgerðastjórnarnámskeið

Starfsmenn AVD koma að þjálfun viðbragðsaðila á landinu. Má þar nefna námskeið í vettvangsstjórn, aðgerðastjórn auk þjálfunar áhafnar Samhæfingarstöðvarinnar. Vikuna 15.-19. janúar var haldið námskeið í vettvangsstjórn en það er ætlað öllum þeim sem koma að samhæfingu neyðaraðgerða. Kennsla fór fram í formi fyrirlestra og skrifborðsæfinga og lauk með raunhæfu verkefni sem namar þurftu að leysa. Ráðgert er að halda annað námskeið í haust. Þessi námskeið eru samvinnuverkefni almannavarnadeildarinnar, Lögregluskóla ríkisins, Brunamálaskólans og Björgunarskóla Slysavarnafélagsins Landsbjargar. Þá héldu starfsmenn almannavarnadeildarinnar námskeið í aðgerðastjórn á Sauðárkróki í mars í tengslum við flugslysaæfingu sem haldin verður í apríl ásamt upprifjunarnámskeiði í vettvangsstjórn.

Heimsfaraldur influensu

Síðastliðinn vetur hófst umfangsmikil undirbúningsvinna á vegum sóttvarnalæknis og almannavarnadeildarinnar við gerð viðbúnaðaráætlunar vegna hugsanlegs heimsfaraldurs influensu.

Þessi vinna hefur staðið yfir í rúmlega ár og er áætlunin ein sú umfangsmesta sem almannavarnadeildin hefur unnið að. Í upphafi var verkinu skipt í 27 minni verkefni og myndaður vinnuhópur um hvert þeirra. Markmiðið er að áætlunin verði tilbúin um næstu áramót.

Viðbúnaður og virkjun Samhæfingarstöðvarinnar

Stuttu fyrir jól urðu mikil flóð á Suðurlandi og Norðurlandi. Eins og jafnan við slíka náttúruvá var Samhæfingarstöðin í Björgunarmiðstöðinni Skógarhlíð virkjuð og voru fulltrúar Slysavarnafélagsins Landsbjargar, lögreglunnar, Slökkviliðs höfuðborgar-svæðisins, Neyðarlínunnar og almannavarnadeildarinnar þar að störfum. Nokkurt tjón var af völdum skriðufalla auk þess að víða flæddi inn í hús og sumarbústaði. Aurskriður fóru yfir ræktunarlönd og girðingar og drápu búfé. Tjón varð á vatnsaflsvirkjun er stífla brast í Djúpadalsá í Eyjafirði. Í mars var viðvarandi snjóflóðahætta og viðbúnaðarástand á norðanverðum Vestfjörðum. Í Bolungarvík þurfti að rýma hús við Dísarland og Traðarland vegna ótraustra snjóalaga í Traðarhyrnu.